



KEMENTERIAN PERDAGANGAN DALAM NEGERI
DAN HAL EHWAL PENGGUNA

KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

20 SEPTEMBER 2021 (ISNIN)



KEMENTERIAN PERDAGANGAN DALAM NEGERI
DAN HAL EHWAL PENGGUNA

KERATAN AKHBAR DAN MEDIA ONLINE (KPDNHEP)

20 SEPTEMBER 2021 (ISNIN)

Usaha KPDNHEP berhasil, harga ayam mula turun

Oleh SHAFIQAH SHUKOR

shafiqah.shukor@mediamulia.com.my

PETALING JAYA: Ketegasan Kementerian Perdagangan Dalam Negeri dan Hal Ehwal Pengguna (KPDNHEP) menangani masalah kenaikan harga barangan keperluan khususnya ayam telah membuahkan hasil.

Itu terbukti apabila harga ayam bersih standard di beberapa negeri seperti Perlis, Kedah, Perak, Kelantan dan Kuala Lumpur kini dijual di bawah harga RM10.00 sekilogram.

Di Kuala Lumpur misalnya, pemeriksaan dijalankan pihak kementerian mendapati hanya pasar awam di Taman Tun Dr. Ismail (TTDI) yang masih menjual ayam pada harga RM10 sekilogram, sementara pasar-pasar lain seperti di Pasar Chow Kita kebanyakannya peniaga menjual ayam di bawah RM10 sekilogram.

Jelas KPDNHEP, pihaknya memandang serius kenaikan harga barangan keperluan asas pengguna kerana ia memberi impak kepada kos sara hidup rakyat terutamanya dalam fasa pandemik Covid-19.

Menurut Dalam Negeri dan Hal Ehwal Pengguna, Datuk Seri Alexander Nanta Linggi, pihaknya sentiasa memantau harga barangan melalui lebih 1,000 pegawai pemantau harga yang mengutip harga setiap hari di mana trend pergerakan harga diketahui dan tindakan segera diambil ke atas premis yang menjual pada harga tidak munasabah berdasarkan pemantauan itu tanpa menunggu aduan daripada pengguna.

Selain itu katanya, lebih 2,200 pegawai penguatkuasa menjalankan pemeriksaan dan pemantauan setiap hari di seluruh negara agar peniaga di semua peringkat terutama peruncit tidak mencatut harga dan kekal menjalankan perniagaan secara beretika.

"Pemantauan harga runcit pada 10 September 2021 mendapati



ALEXANDER NANTA LINGGI

harga purata ayam bersih standard peringkat nasional adalah pada paras RM8.83 sekilogram.

"Di Semenanjung, harga purata ayam bersih standard adalah RM8.78 sekilogram dan julat harga jualan adalah antara RM5.99 hingga RM11 sekilogram," katanya dalam kenyataan.

Sementara itu, tambahnya, di Sabah, harga purata ayam bersih standard adalah pada RM11.33 sekilogram. Manakala di Sarawak, harga purata ayam bersih standard adalah RM8.56 sekilogram.

Dalam masa yang sama, katanya, pasar-pasar raya besar seperti Tesco atau Lotus, Giant, Mydin dan Econsave masih menawarkan ayam bersih standard pada harga berpatutan.

Alexander berkata, pihaknya telah mengarahkan agar pendekatan baharu diambil bagi menangani masalah kenaikan harga barang terutama harga ayam yang sering berulang.

"Pendekatan baharu itu membabitkan pengeluaran surat pemberitahuan kepada peniaga borong dan runcit untuk



PEGAWAI penguatkuasa KPDNHEP merekodkan harga ayam yang dijual oleh seorang peniaga. - **GAMBAR HIASAN**

mengadakan libat urus bersama pengeluar dan penternak ayam di lokasi atau lokaliti berlakunya kenaikan harga.

"Pendekatan itu bertujuan membolehkan peniaga menyemak harga barang dan kos belian bagi mendapatkan margin untung yang lebih munasabah selain peringatan kepada peniaga ayam supaya tidak menaikkan harga di mana-mana peringkat rantai pengedaran sewenang-wenangnya," katanya.

Ujarnya, peniaga di semua peringkat rantai diminta mengekalkan etika yang tinggi dalam menjalankan perniagaan dan membantu kerajaan agar harga

ayam kekal stabil tanpa kenaikan mendadak dan berterusan.

Alexander berkata, industri dan bekalan ayam dikawal selia oleh Kementerian Pertanian dan Industri Makanan (MAFI) dan KPDNHEP bersedia memainkan peranan berkaitan polisi harga ayam di pasaran.

"Kami tidak bercadang untuk memperkenalkan kawalan harga tambahan selain yang telah dilaksanakan ketika musim perayaan besar Malaysia di bawah Skim Harga Maksimum Musim Perayaan (SHMMP)," katanya.

Menurut laporan, kenaikan harga ayam baru-baru ini adalah

disebabkan peningkatan kos bagi bahan-bahan utama makanan ayam sehingga 80 peratus seperti jagung dan soya yang diimport sepenuhnya akibat permintaan yang tinggi terutama dari China dan kesan pertukaran asing.

Langkah kerajaan membuka lebih banyak sektor ekonomi di mana kebanyakan negeri telah beralih ke Fasa 2 dan 3 Pelan Pemulihan Negara (PPN) telah meningkatkan permintaan sedangkan pengeluaran ayam mengambil masa sekitar 32 hari sebelum ia boleh dipasarkan.

Apa yang berlaku adalah bersifat sementara dan KPDNHEP meminta pengguna bersabar serta menggunakan hak dalam mencari alternatif yang ada seperti premis-premis yang masih menjual pada harga patut.

Pengguna disaran menggunakan aplikasi *Price Catcher* untuk mendapatkan maklumat harga dan premis serta membuat perbandingan harga barang keperluan sebelum berbelanja. Pengguna dinasihatkan supaya fleksibel untuk beralih ke premis lain jika premis yang sering mereka berbelanja tidak lagi menjual pada harga yang menepati bajet mereka.

Sebagaimana biasa, kementerian semestinya akan mengadakan sesi libat urus bersama pihak industri terutama pengeluar ayam dan mencadangkan pihak penternak memberi kerjasama supaya harga ayam tidak dinaikkan secara mendadak dalam julat masa yang singkat bagi mengelak berlaku tekanan harga di peringkat borong dan runcit.



PEGAWAI penguatkuasa KPDNHEP memantau harga barangan dan ayam di sebuah pasar. - GAMBAR HIASAN



PEGAWAI penguatkuasa KPDNHEP melakukan pemeriksaan harga ayam di sebuah pasar basah bagi memastikan peniaga mematuhi harga ditetapkan. - GAMBAR HIASAN

Pendekatan baharu KPDNHEP berjaya turunkan harga ayam



Oleh **RIDZAUDDIN ROSLAN**

PETALING JAYA – Beberapa pendekatan baharu yang diambil Kementerian Perdagangan Dalam Negeri dan Hal Ehwal Pengguna (KPDNHEP) dalam menangani isu kenaikan harga ayam dilihat mula membuahkan hasil.

Kejayaan itu dapat diterjemahkan apabila harga ayam bersih standard di beberapa negeri seperti Perlis, Kedah, Perak, Kelantan dan Kuala Lumpur kini dijual di bawah harga RM10 sekilogram (kg).

Dalam pada itu, pemeriksaan dilakukan penguat kuasa KPDNHEP di beberapa pasar sekitar ibu negara turut mendapati hanya pasar awam di Taman Tun Dr. Ismail, Kuala Lumpur menjual temakan itu dengan harga melebihi RM10 sekilogram, manakala lokasi lain di bawah paras itu.

Menurut Menteri KPDNHEP, Datuk Seri Alexander Nanta Linggi, pihaknya sentiasa mengambil maklum suara orang ramai berhubung kenaikan itu berikutan dilihat memberi impak kepada kos sara hidup terutamanya dalam suasana Covid-19.



ALEXANDER

"Kami mengambil beberapa pendekatan untuk menstabilkan semula harga ayam antaranya mengeluarkan surat pemberitahuan kepada peniaga peringkat borong serta runcit untuk menjalankan libat urus bersama pengeluar dan penternak ayam di lokasi berlaku kenaikan.

"Usaha itu membolehkan peniaga menyemak harga barang dan kos belian bagi mendapatkan margin untung lebih munasabah serta memberi peringatan supaya tidak menaikkan harga di peringkat pengedaran sesuka hati," katanya.

Pada masa sama, KPDNHEP sentiasa memantau harga barangan menerusi 1,000 Pegawai Pemantau Harga yang berperanan mengutip harga setiap hari dan tindakan segera akan diambil kepada premis mengenakan harga tidak munasabah.

Alexander berkata, seramai 2,200 pegawai penguat kuasa turut menjalankan pemeriksaan dan pemantauan setiap hari di seluruh negara agar peniaga di semua peringkat terutamanya peruncit tidak mencatut harga



PEGAWAI Pemantau Harga memantau harga barangan setiap hari di premis perniagaan di seluruh negara.

serta lebih beretika.

"Berdasarkan pemeriksaan itu, harga runcit pada 10 September 2021 mendapati, harga purata ayam bersih standard peringkat nasional adalah pada paras RM8.83 sekilogram.

"Di Semenanjung pula, harga purata ayam bersih standard adalah RM8.78 sekilogram dan julat harga jualan adalah antara RM5.99 hingga RM11 sekilogram," ujarnya.

Di Sabah pula, katanya, harga purata ayam bersih standard adalah pada RM11.33 sekilogram, manakala di Sarawak, harga purata ayam bersih standard adalah RM8.56 sekilogram.

Bagaimanapun, beberapa pasar raya besar seperti Tesco,

Lotus, Mydin dan Econsave masih menawarkan harga ayam pada kadar berpatutan serta disifatkan tidak membebankan pengguna khususnya golongan B40.

"Jadi, KPDNHEP meminta agar semua peniaga di peringkat rantaian mengekalkan etika yang tinggi dalam menjalankan perniagaan seterusnya membantu kerajaan agar harga ayam kekal stabil tanpa kenaikan mendadak," jelasnya.

Dalam perkembangan lain, Alexander menjelaskan, KPDNHEP akan mengadakan perbincangan berterusan dengan Kementerian Pertanian dan Industri Makanan (MAFI) dalam memastikan faktor hulu seperti dedak ayam

diimport yang mempengaruhi harga ayam diminimumkan.

"Kementerian juga tidak bercadang memperkenalkan kawalan harga tambahan selain yang dilaksanakan ketika musim perayaan besar di bawah Skim Harga Maksimum Musim Perayaan (SHMMP).

"Bagaimanapun, KPDNHEP tidak teragak-agak untuk melaksanakan kawalan harga jika ia terus meningkat di luar kawalan atau terdapatnya kartel yang memanipulasi harga di semua peringkat rantaian," jelasnya.

Menurut laporan, kenaikan harga ayam sebelum ini disebabkan peningkatan kos bagi bahan-bahan utama makanan ayam sehingga 80 peratus seperti jagung dan soya yang diimport sepenuhnya akibat permintaan tinggi terutama dari negeri China dan kesan pertukaran asing.

Susulan itu, pengguna diminta bersabar dengan situasi tersebut berikutan ia hanya bersifat sementara selain perlu lebih bijak untuk membeli ayam di premis yang menawarkan harga murah serta berpatutan.

Pengguna juga disarankan menggunakan Aplikasi Price Catcher untuk mendapatkan maklumat harga dan premis serta membuat perbandingan harga barang keperluan sebelum berbelanja.

Dalam pada itu, orang ramai juga dinasihatkan supaya lebih fleksibel untuk beralih ke kedai lain jika premis yang sering mereka berbelanja tidak lagi menjual pada harga yang menepati bajet mereka.



PEGAWAI penguat kuasa sertasa membuat pemantauan bagi memeriksa harga ayam di pasaran agar tidak membebankan pengguna.



PENGGUNA perlu bijak memilih premis yang menawarkan barangan dan bahan mentah pada harga yang telah dikawal oleh kerajaan.

199 farmasi, klinik tawar kit ujian COVID-19 lebih murah

Oleh Roselan Ab Malek
bhnews@bh.com.my

Temerloh: Pemantauan Kementerian Perdagangan Dalam Negeri dan Hal Ehwal Pengguna (KPDNHEP) mendapati, terdapat 199 farmasi dan klinik di seluruh negara, menjual kit ujian pantas sendiri COVID-19 di bawah harga ditetapkan kerajaan, RM19.90 seunit.

Pengarah Penguat Kuasa KPDNHEP, Azman Adam, menyifatkan usaha klinik dan farmasi terbabit adalah baik kerana kit RTK Ujian Pantas Kendiri itu kini semakin mendapat sambutan

tan orang ramai kerana kes COVID-19 masih meningkat.

“Ini adalah satu petanda yang bagus. Pihak farmasi dan klinik sedia bekerjasama dengan kerajaan dengan menawarkan harga yang lebih rendah bagi membolehkan lebih ramai membelinya.

“Kita mendapat maklumat di pihak pemborong juga berlaku sedikit penurunan harga. Ini adalah satu petanda baik yang mana satu masa nanti lebih ramai dapat membelinya kerana harga yang lebih murah.

Nasional 7

'5.3 juta kit di pasaran'

Dari Muka ¹

"Setakat ini hasil pemeriksaan terhadap 1,999 farmasi dan klinik di seluruh negara, kita dapati semua peniaga mematuhi sepenuhnya harga yang ditetapkan kerajaan, malah ada 199 farmasi dan klinik yang menjual bawah harga ditetapkan," katanya.

Beliau berkata demikian selepas membuat lawatan kerja ke farmasi dan pasar raya sekitar Temerloh dan Mentakab, kelmarin.

Azman berkata, orang ramai tidak perlu risau kemungkinan kekurangan peranti berkenaan kerana minggu lalu ada stok 5.3

juta kit berkenaan di pasaran.

Ketika ini ada 18 syarikat yang diberi kebenaran oleh Kementerian Kesihatan (KKM) untuk membawa masuk dan mengilang kit ujian berkenaan.

Mengenai kenaikan harga ayam, beliau menegaskan KPDNHEP sentiasa memantau pergerakan harga di pasar besar, pasar raya dan semua peringkat jualan bagi memastikan tidak berlaku kenaikan yang melampau.

"Setakat ini kita sudah keluarkan 164 notis kepada premis terbabit dan mereka bersetuju menurunkan harga ayam pada paras yang lebih munasabah.

"Kita akan terus berada di lapangan bagi memastikan tiada peniaga yang mengambil kesempatan dan dijangka harga ayam dapat distabilkan segera," katanya.

Azman berkata pada minggu lepas didapati peniaga menjual ayam hingga RM11.30 sekilogram tetapi minggu ini kebanyakan peniaga menjual dengan harga di bawah RM10 sekilogram.

Katanya KPDNHEP turut berbincang dengan pemborong, penernak dan peruncit dan mereka bersetuju untuk menurunkan harga ayam pada harga yang lebih munasabah dengan mengurangkan kadar keuntungan.



AZMAN (dua dari kanan) melakukan pemantauan di sebuah farmasi di Temerloh semalam.

Kit ujian sendiri dijamin cukup

TEMERLOH – Bekalan kit ujian pantas antigen (RTK-Ag) secara sendiri yang dijual di farmasi dijamin mencukupi bagi menampung permintaan pasaran susulan pembukaan banyak sektor ekonomi dan gelembung pelancongan.

Pengarah Bahagian Penguat Kuasa Kementerian Perdagangan Dalam Negeri dan Hal Ehwal Pengguna (KPDNHEP), Azman Adam berkata, pihaknya sentiasa memantau bekalan kit berkenaan yang merekodkan stok sebanyak 5.3 juta unit pada minggu lalu.

“Jadi orang ramai tidak perlu bimbang kerana bekalan tersebut semakin hari semakin bertambah dan kami dapati senarai pembekal yang mendapat kelulusan membawa masuk kit

berkenaan melalui Kementerian Kesihatan juga bertambah.

“Sekarang ini kita sudah ada 18 syarikat yang diluluskan untuk membawa masuk dan mengilang RTK-Ag secara sendiri ini,” katanya selepas melakukan pemantauan di sebuah farmasi di sini semalam.

Hadir sama, Ketua Pegawai Penguat Kuasa KPDNHEP Temerloh, Abdul Razak Yahaya.

Menurut Azman, pihaknya terus melakukan pemantauan berterusan bagi memastikan kit berkenaan dijual tidak melebihi harga ditetapkan iaitu RM19.90.

Katanya, sehingga kini sebanyak 1,999 buah farmasi telah diperiksa di seluruh negara bagi memastikan mereka mematuhi peraturan ditetapkan.

“Daripada pemeriksaan, kira-

kira 199 farmasi didapati menjual dengan lebih murah di bawah harga ditetapkan dan sehingga kini kita tidak menerima laporan mengenai penjualan kit tiruan,” katanya.

Sementara itu, beliau berkata, pihaknya turut melakukan pemantauan ke atas alat bacaan oksigen atau oximeter agar ia tidak dijual dengan harga yang melampau.

“Kalau kita menerima aduan tentang kenaikan harga yang melampau contohnya minggu ini harga RM120 tiba-tiba minggu depan naik kepada RM180 yang tidak munasabah, maka kita boleh menyiasat di bawah Akta Kawalan Harga dan Anti Pencatutan, kita boleh siasat kalau ada pergerakan harga yang melampau,” ujarnya.



Nor Nadia menyusun sayur di gerai miliknya di Pasar Kedai Payang, semalam.

(Foto Zatul Iffah Zolkipli/BH)

Harga lima jenis sayur pula naik

Peniaga di Pasar Kedai Payang dakwa kenaikan hingga RM4 sekilogram

Oleh Zatul Iffah Zolkipli
bhnews@bh.com.my

Kuala Terengganu: Ketika isu kenaikan harga ayam dan ikan di pasar daerah ini belum reda, kini sekurang-kurangnya lima jenis sayur pula menunjukkan perkembangan sama.

Tinjauan di Pasar Kedai Payang, mendapati lima jenis sayur seperti cili merah, salad, lengkuas dan bunga kobis, menunjukkan peningkatan di antara RM2 hingga RM4 sekilogram, dalam tempoh seminggu bermula 11 September lalu.

Sebelum ini, cili merah dijual dengan harga RM10 sekilogram

(kg), namun kini harganya mencecah RM14 sekilogram, manakala bunga kobis yang sebelum ini dijual dengan harga RM8.70 meningkat kepada RM10 sekilogram.

Peniaga, Nor Nadia Musa, 25, mendakwa harga beberapa jenis sayur itu mula meningkat sejak seminggu lalu apabila permintaan meningkat secara tiba-tiba.

"Kenaikan mula berlaku sejak Sabtu lalu (11 September) apabila harga sayur seperti cili merah naik 50 sen bagi setiap kilogram dan dalam tempoh seminggu ini, sudah naik sehingga RM4.

"Memang tidak semua sayur naik harga, tetapi saya boleh cakap lima jenis sayur ini meningkat sejak beberapa hari lalu," katanya ketika ditemui di Pasar Kedai Payang, di sini, semalam.

Bagi peniaga, Mohd Zaki Ali, 50, kenaikan harga beberapa jenis sayuran itu secara berperingkat itu menyebabkan pendapatan mereka merosot sehingga 20 peratus, selain terpaksa menanggung kerugian jika sayuran berkenaan tidak terjual.

"Walaupun kenaikan itu hanya

50 sen sehari, apabila setiap hari naik, memang terjejas pendapatan dan pelanggan juga bertanya mengenai kenaikan itu.

"Saya tidak tahu apa punca kenaikan ini, tetapi mungkin sebab kekurangan bekalan," katanya.

Pengusaha kedai makan, Suzila Mohd Zin, 35, berkata peningkatan harga sayur sedikit sebanyak menjejaskan pendapatannya, memandang dia membeli sayuran dalam kuantiti banyak.

"Kalau beli secara runcit, mungkin tidak terasa sangat kenaikan tetapi sebagai peniaga, saya perlu membeli dalam jumlah yang banyak.

"Situasi ini menyebabkan saya tersepit kerana saya tidak boleh menaikkan harga makanan sesuka hati," katanya.

Sebelum ini, harga ayam segar di Terengganu meningkat kepada RM10 sekilogram berbanding RM8 sebelumnya. Keadaan itu masih tidak berubah, manakala harga beberapa jenis ikan di Pasar Kedai Payang turut mengalami kenaikan hingga RM2 sekilogram.

		Senarai Harga Barang Keperluan	
• Ayam	RM5.99	• Telur Gred A	RM12.60
• Daging Lembu Tempatan	RM35	• Ikan Kembung	RM12.90
• Daging Lembu Import	RM25	• Minyak Masak	RM6.50
• Gula Pasir	RM2.80	• Bawang Putih	RM5.99
• Bawang Besar Holland	RM2.80	• Cili Merah	RM9.99
• Bawang Putih	RM5.99	• Kubis Bulat Tempatan	RM2.19
		• Tepung Gandum	RM2.19
<i>*Harga (RM/kg) Sumber: KPDNHEP</i>			